



Republika e Kosovës – Republika Kosova
Paneli Zgjedhor për Ankesa dhe Parashtresa
Izborni Panel za Žalbe i Predstavke

Anr.548/2021

Paneli Zgjedhor për Ankesa dhe Parashtresa (PZAP), në panelin e përbërë nga gjyqtarët: Rustem Thaqi - kryesues, Afijete Sada – Gllogjani dhe Burim Ademi anëtarë, duke vendosur lidhur me apelin e parashtruar nga Driton Ajazi, nga Iniciativa Qytetare Dekada e Re për Drenasin, paraqitur kundër Zyrës për Regjistrim të Partive Politike dhe Certifikim (ZRPPC) të Komisionit Qendror të Zgjedhjeve (KQZ), për shkak të kërkesës për ndryshim të emrit të “Iniciativës Qytetare Dekada e Re për Drenasin” për pjesëmarrje në Zgjedhjet Lokale 2021, në seancën e panelit të mbajtur me 30.08.2021, mori këtë:

V E N D I M

HUDHET i palejuar apeli Anr.548/2021 i datës 28.08.2021, i parashtruar nga Driton Ajazi, nga “Iniciativa Qytetare Dekada e Re për Drenasin”, paraqitur kundër Zyrës për Regjistrim të Partive Politike dhe Certifikim (ZRPPC)-KQZ-së, për shkak të kërkesës për ndryshim të emrit të iniciativës qytetare në fjalë, për pjesëmarrjen në Zgjedhjet Lokale të Republikës së Kosovës që do të mbahen me datën 17 Tetor 2021.

A r s y e t i m

Parashtruesi i apelit Driton Ajazi, nga Iniciativa Qytetare Dekada e Re për Drenasin, me datën 28.08.2021, ka paraqitur apel në PZAP, kundër aktit administrativ Nr.779/27.08.2021 të Zyrës për Regjistrim të Partive Politike dhe Certifikim (ZRPPC) të Komisionit Qendror të Zgjedhjeve (KQZ), me të cilin pretendon se KQZ-ja, e ka zbatuar në mënyrë të gabuar dispozitën e nenit 21 të LZP-së, pasi që i ka kërkuar iniciativës qytetare në fjalë që ta ndërroj emërtimin e tij, me arsyetimin që ky emërtim mund të shkaktoj ngatërrim, apo çorientim të votuesve për shkak që ky emërtim është përdorur nga subjekti politik PDK, si platformë politike dhe vazhdon të përdoret ende. Andaj sipas parashtruesit të apelit duke e interpretuar në mënyrë të gabuar, neni 21 paragrafi 1 i LZP-së, i cili parasheh se: “KQZ-ja, nuk e certifikon subjektin politik me emër apo akronim që është i njëjtë si apo sipas gjykimit të KQZ-së, është i ngatërrueshëm, mashtrues ose i ngjashëm me emrin apo akronimin me të cilin një subjekt tjetër politik është certifikuar më herët”. Nga kjo dispozitë rrjedh se një subjekt politik nuk mund të certifikohet nëse emri apo akronimi i tij është i ngjashëm me emrin apo akronimin që një subjekt tjetër, i cili është certifikuar në zgjedhjet e mëhershme. Pra nga ky interpretim mund të konkludohet se emri apo akronimi i një subjekti politik që aplikon për certifikim nuk mund të jetë i njëjtë apo i ngjashëm, ngatërrues, apo mashtrues me emrin e një subjekti tjetër nga zgjedhjet e mëparshme.

Sipas parashtruesit të apelit PDK, asnjëherë nuk ka pasur emërtimin “Dekada e Re” apo akronimin “DRD” dhe se ky emërtim nuk ka qene emërtimi me të cilin PDK, ka aplikuar në zgjedhjet e kaluara për certifikim dhe nuk është shfaqur as në fletëvotimet e zgjedhjeve asnjëherë më parë si ato të zgjedhjeve parlamentare apo komunale andaj këtu konsiston shkelja kryesore materiale e KQZ-së, pasi që dispozita e nenit 21 të LZP-së, nuk mbron slloganet por vetëm emrat dhe akronimet e njëjta, ngatërruese, mashtruese apo të ngjashme, përderisa LZP-ja, sanksionon vetëm emërtimet dhe akronimet, andaj kjo dispozite nuk mund të zgjerohet dhe të përfshij edhe slloganet.

Parashtruesi i apelit thekson se me ane të këtij akti juridik, janë duke u cenuar interesat juridike të “Iniciativës Qytetare Dekada e Re për Drenasin”, pasi që KQZ-ja, është dashur që të nxjerr vendim me të cilin obligohet që të bëjë ndryshimin e emrit brenda një afati të caktuar dhe jo të procedoj menjëherë me kërkesën për ndërrim të emrit, e i cili në rastin konkret përbën akt real administrativ, pasi që ky akt nuk përmban as dispozitivin e tij me anë të të cilit obligohet ndërrimi i emrit, e i cili element është i detyrueshëm në bazë të nenit 27 të LPA-së dhe se arsyetimi i këtij akti është në kundërshtim me nenin 48 të LPA-së, pasi që i njëjti nuk përmban fakte mbi të cilat është bazuar nxjerrja e vendimit. Parashtruesi i apelit kërkon nga PZAP-i, që të aprovohet ankesa dhe të anulohet akti administrativ Nr. 779-27.08.2021 i KQZ-së, dhe e njëjta ta bëjë certifikimin e Iniciativës Qytetare Dekada e Re për Drenasin me emërtimin, akronimin dhe përmbajtjen me të cilën ka aplikuar.

Me datë 28.08.2021 PZAP, i ka paraqitur KQZ-së, kërkesë për përgjigje duke kërkuar që të paraqesë përgjigje në ankesë deri me datë 29.08.2021 ora 10:00.

KQZ-ZRPPC-ja, në përgjigjen në ankesë ka theksuar, Zyra gjatë procesit të shqyrtimit të aplikacionit të “IQ Dekada e Re për Drenasin”, e verifikoj edhe kundrejt kriterit të emërtimit të aplikuesit për certifikim sipas nenit 21 të Ligjit për Zgjedhje të Përgjithshme (LZP), i cili thekson: “ 21.1 KQZ-ja, nuk e certifikon subjektin politik me emër apo akronim që është i njëjtë si, apo sipas gjykimit të KQZ-së, është i ngatërrueshëm, mashtrues ose i ngjashëm me emrin apo akronimin me të cilin një subjekt tjetër politik është certifikuar më herët, 21.2 Nëse dy apo më shumë subjekte politike aplikojnë për certifikim me emra apo akronime që janë të njëjta, apo aq të ngjashme sa që me siguri se do të shkaktojnë ngatërrim apo çorientojnë votuesit, KQZ-ja, vendos se cili subjekt ka të drejtën për t’u certifikuar me emrin dhe akronimin. Në vendimin se cili subjekt politik ka të drejtën për t’u certifikuar nën cilin emër dhe akronim, KQZ-ja, ka parasysh datën kur secili subjekt ka dorëzuar aplikimin e tij në KQZ dhe përdorimin paraprak të emrave dhe akronimeve, dhe 21.4 Asgjë në këtë nen nuk e pamundëson certifikimin e kandidatëve të pavarur me emrin ligjor të tij apo saj. Në rast se emrat janë të njëjtë, KQZ-ja mund të përfshijë informata për të bërë dallimin e tyre dhe për t’i ikur ngatërrimit në fletëvotim”.

Me procesin e shqyrtimit të aplikacionit për certifikim të “Iniciativës Qytetare Dekada e Re për Drenas”, për pjesëmarrje në Zgjedhjet Lokale në Republikën e Kosovës, që do të mbahen me datën 17 tetor 2021, Zyra ka pranuar edhe një shkresë të Partisë Demokratike të Kosovës. Pastaj, Iniciativa Qytetare Dekada e Re, me shkresë është njoftuar me përmbajtjen e pretendimeve të PDK-se. Brenda afatit të caktuar z. Ajazi në emër të Iniciativës Qytetare Dekada e Re ka kthyer përgjigje duke i hedhur poshtë pretendimet e PDK-së.

Zyra në emër të KQZ, me përkrahjen edhe të Këshillit për Çështje Ligjore të Komisionit Qendror të Zgjedhjeve, ka shqyrtuar pretendimet e të dyja palëve dhe ka ardhur në përfundim që emri i Iniciativës Qytetare Dekada e Re për Drenas, mund të shkaktoj ngatërrim apo çorientim të votuesit për shkak që ky emër është përdorur nga Partia Demokratike e Kosovës si platformë politike dhe vazhdon të përdoret.

Rrjedhimisht, Zyra i kërkoj Iniciativës Qytetare Dekada e Re për Drenas që të ndryshojnë emërtimin, për të ju mundësuar certifikimin. Në të kundërtën, Zyra do të rekomandojë mos-certifikim të iniciativës në fjalë për shkak të mospërputhshmërisë me nenin 21 të LZP-së.

Z. Ajazi, në emër të Iniciativës Qytetare Dekada e Re për Drenas, me datë 28 gusht 2021, ka dorëzuar shkresën me të cilën njofton që ndërron emërtimin, nga Iniciativa Qytetare Dekada e Re për Drenasin, në Demokratët për Drenasin me akronim DD, por në të njëjtën kohë do ndjek rrugët ligjore për të rikthyer emrin, Dekada e Re për Drenas.

Pasi që iniciativa qytetare ka ndërruar emërtimin sipas kërkesës së Zyrës dhe ka përmbushur të gjitha kriteret tjera ligjore, Zyra ka rekomanduar certifikimin e Iniciativës Qytetare Demokratët për Drenasin. KQZ ka certifikuar Iniciativën Qytetare Demokratët për Drenasin me vendimin numër 2146/2021 të datës 28 gusht 2021, me listën prej një kandidati për kryetar komune dhe 34 kandidat për Kuvend Komunal.

Paneli, pasi që shqyrtoi dhe vlerësoj të gjitha pretendimet e apelit, në kuptim të nenit 117 par.2 të LZP-së, gjeti se:

Apeli është i palejuar

Paneli, vlerësoi lejueshmërinë e apelit dhe ka ardhur në përfundim se i njëjti nuk i plotëson kushtet e përcaktuara me nenin 122 të LZP-së dhe nenin 10 të Rregullës Nr. 02/2015-Rregullat dhe Procedurat e PZAP-it.

Paneli, konstaton se pretendimet ankimore të parashtruara nga Driton Ajazi, nga Iniciativa Qytetare Dekada e Re për Drenasin, të paraqitur kundër kërkesës me Nr. 779-27.08.2021 të Zyrës për Regjistrim të Partive Politike dhe Certifikim (ZRPPC), të Komisionit Qendror të Zgjedhjeve (KQZ), lidhur me kërkesën për ndryshim të emrit Dekada e Re për Drenasin për pjesëmarrje në Zgjedhjet Lokale 2021, nuk mund të jetë objekt i vlerësimit në këtë fazë të procesit zgjedhor, për faktin se, KQZ-ja nuk ka marrë vendim lidhur me certifikimin apo refuzimin e kësaj iniciative qytetare me emërtimin Dekada e Re për Drenasin.

Kërkesa e ZRPPC-së, drejtuar subjekteve politike për ndryshimin e emërtimeve të tyre nuk është vendim i KQZ-së, ndaj të cilit lejohet apeli, por është një kërkesë nga ZRPPC-ja, ku subjekti është i njoftuar se emërtimi i tij nuk është i përshtatshëm sipas Ligjit, dhe subjektit i rekomandohet që duhet që ta bëjë ndryshimin brenda një periudhe të caktuar para se të ZRPPC-ja, ti rekomandoj KQZ-së, certifikimin apo mos certifikimin e subjekteve politike me listën e kandidatëve.

Pra faza kur është parashtruar apeli është e parakohshme sepse nuk kemi vendimmarrje të KQZ-së, për certifikim apo refuzim të subjektit politik dhe listës së tyre me emërtimin Dekada e Re për Drenasin, por kemi vetëm kërkesë për ndryshim të emërtimit ndaj iniciativës qytetare të cilit i përket apeluesi, dhe se i njëjti nuk është i obligueshëm të bëjë ndryshimin e emërtimit nëse vlerëson se emërtim është i përshtatshëm dhe në pajtim me nenin 21 të LZP-së.

Meqenëse në rastin konkret nga ana e KQZ-së, nuk është marrë vendim lidhur me këtë çështje juridike, Paneli vlerëson se nuk është nën juridiksionin e këtij institucioni që në këtë fazë të procesit, të vendosë lidhur me kërkesat e ZRPPC-së – KQZ-së, lidhur me ndryshimin e emërtimeve të subjekteve politike, ngase sipas nenit 122 par.1 pikat a), b), c), d), e) dhe f) të LZP-së, PZAP-i, vendos vetëm për vendime të KQZ-së, të cilat përfshihen shprehimisht në dispozitën e sipërshënuar. Në këtë rast, meqenëse nga ana e KQZ-së, nuk është marrë vendimi lidhur me certifikimin apo refuzimin e subjektit politik në fjalë për pjesëmarrje në zgjedhje, u vendos si në dispozitiv të këtij vendimi.

Hudhja e ankesës së ankuesit në këtë fazë të procedurës, mbi këtë bazë nuk cenon të drejtën e ankuesit që pas certifikimit të subjektit politik dhe listës së kandidatëve për pjesëmarrjen në gara për Zgjedhjet Lokale të cilat do të mbahen më 17 Tetor 2021, të paraqes sërish apel, nëse konsideron se i është cenuar e drejta e pretenduar, edhe pas certifikimit të listës nga ana e KQZ-së.

Paneli Zgjedhor për Ankesa dhe Parashtresa

Anr.548/2021 më datën 30.08.2021



Kryesues i Panelit

Krustem Thaçi

Këshilla Juridike: Kundër këtij vendimi është e lejuar ankesa sipas nenit 118 par. 4 të LZP-së, në Gjykatën Supreme të Kosovës, brenda njëzetekatër (24) orëve nga momenti i marrjes-pranimimit të këtij vendimi.